

**Sistem Pendidikan Di Malaysia Lebih Baik Berbanding Negara-Negara Maju:
Muhyiddin
mStar Online
Mac 31, 2012
Oleh AMINUDDIN MOHSIN**

KUALA LUMPUR: Generasi muda di Malaysia mendapat pendidikan lebih baik berbanding negara-negara maju yang lain berdasarkan laporan daya saing global, Forum Ekonomi Dunia, kata Timbalan Perdana Menteri Tan Sri Muhyiddin Yassin.

Beliau berkata, menerusi laporan tersebut, Malaysia menduduki ranking ke-14 antara 142 negara dalam kualiti pendidikan dan kedua di rantau Asean.

"Kepada sesiapa yang datang kepada saya mengadu mengenai sistem pendidikan kita, nampaknya laporan itu bertentangan dengan dakwaan mereka.

"Tambahan pula, laporan itu turut menyatakan bahawa generasi muda kita menerima pendidikan yang lebih baik berbanding pelajar di Amerika Syarikat, Britain dan Jerman," kata Muhyiddin pada Karnival Pengajian Tinggi Negara di Pusat Dagangan Dunia Putra (PWTC) di sini.

Beliau turut mengulangi komitmen kerajaan bahawa setiap rakyat perlu menikmati pendidikan yang murah dan berkualiti.

"Hanya dengan pendidikan berkualiti boleh meningkatkan daya intelektual dan keupayaan modal insan sebagai teras ke arah menjadi sebuah negara berpendapatan tinggi menjelang 2020," katanya.

Hakcipta Terpelihara © 1995-2012 Star Publications (Malaysia) Bhd

Source:

http://mstar.com.my/berita/cerita.asp?file=/2012/3/31/mstar_berita/20120331152712&sec=mstar_berita